

四庫全書

子部

欽定四庫全書

子部

御定淵鑑類函卷一百三十四

詳校官內閣學士臣尹壯圖

主事臣祁韻士覆勘

總校官檢討臣何思鈞

校對官中書臣馮培

膳錄監生臣宋允奎

欽定四庫全書

御定淵鑑類函卷一百三十四

政術部十三

鹽鐵

權酷

增權茶

算緡

關市征雜稅

山澤稅附

貢獻

關貢

訴貢賦附

鹽鐵

原管子曰海王

之國海王者言以負海之利而王其業

謹正鹽筴

正稅也音

征十口之家十人食鹽百口之家百人食鹽終月大男

食鹽五升少半

少半猶劣薄也

大女食鹽三升少半吾子食鹽

二升少半

吾子猶小男少女也

此其大厯也

厯數

鹽百升而釜

鹽十兩

七銖一黍十分之一為升當米六合四勺也百升之鹽七十六斤十二兩十九銖二釐為釜當米六斗四升

今鹽之重升加分強釜五十也

分強半強也今使鹽官稅其鹽之重每一斗加

半合為強而取之則一釜之鹽得五十合而謂之強升加一強釜百也升加二強

釜二百也鍾二千

十釜之鹽七百六十八斤為鍾當米六斛四斗是

十鍾二萬

百鍾二十萬千鍾二百萬萬乘之國人數開口千萬也

舉其大數而言之也開口謂大男大女之所食鹽也

禹筮之商日二百萬

禹讀為偶偶對

也商計也對其大男大女食鹽者之口數而立筮以計所稅之鹽一日計二百萬合為二百鍾

十日二

千萬一月六千萬萬乘之正九百萬也萬乘之國大男

萬人而稅之鹽一日二百鍾十日二千鍾一月六千鍾也今又施其稅數以千萬人如九百萬人之數則所稅

之鹽一日百八十鍾十日千月人三十錢之籍為錢三

八百鍾一月五千四百鍾千萬又變其五千四百鍾之鹽而籍其錢計一月每人

數而比其常籍當一今吾非籍之諸君吾子而有二國

之籍者六千萬諸君謂老男老女也六十以上為老男

女又不籍於少男少女乃能以千萬人而當三千萬人

者蓋鹽官之利耳鹽官之利既然則鐵官之利可知也

鹽官之利當一國而三萬人鐵官之利當一國而三萬人

人焉故能有二國之籍者六千萬人耳其常籍入之數

欽定四庫全書御定淵鑑類函卷一百三十四二

猶在使君施令曰吾將籍於諸君吾子則必罰號令天

給之鹽筴則百倍歸於上人無以避此者數也今鐵官

之數曰一女必有一鍼一刀若其事立若猶耕者必有

一耒一耜一鉞若其事立大鉞謂之行服連聲名所以

者軺羊昭輦居玉者大車駕馬必有一斤一鋸一錐一鑿若

其事立不爾而成事者天下無有今鍼之重加一也三

十鍼一人之籍鍼之重每十分加一分為強而取刀之

重加六五六三十五刀一人之籍也刀之重每十分加

之五六為三十也則一女之籍得五刀 耜鐵之重加七三耜鐵一人之籍

也 耜鐵之重每十分加七分以為強其餘輕重皆准此

而取之則一農之籍得三耜鐵也而行其器彌多然則舉臂勝音事無不服籍者桓公曰

然則國無山海不王乎管子曰因人之山海假之名有

海之國雖無海而假名有海則售鹽於吾國彼國有鹽

國為釜十五吾受而官出之以百售耳受取也假今彼鹽平

加五錢而取之所以來之也既得彼鹽則我未與其本

今吾國鹽官又出而羅之釜以百錢也事也與用也本受人之事以重相推以重相推謂加五

欽定四庫全書御定淵鑑類函卷一百三十四三

也 此人用之數也彼人所有而又曰齊有渠展之鹽渠

齊地沛水所流入海之處可請君伐菹薪草枯煮水為

煮鹽之所也故曰渠展之鹽鹽煮海正音而積之十月始正至於正月成三萬鍾下

令曰孟春既至農事且起大夫無得繕冢墓理宮室立

臺榭築牆垣北海之眾無得聚庸庸功而煮鹽北海之

海煮鹽之人本意禁人煮鹽下令託以農事慮有妨奪先自大夫起欲人不知其機斯為權術此則坐

長十倍以令糴之梁趙宋衛濮陽彼盡餽食之國本國

鹽達鉅無鹽則踵守圉之國固與禦同用鹽獨甚桓公

而食

乃使糴之得成金萬斤 漢孝武中年大興征伐財用

匱竭於是大農上鹽鐵丞孔僅東郭咸陽言山海天地

之藏皆宜屬少府陛下弗私以屬大農佐賦願募民自

給費因官器作者煮鹽官與牢盆

牢價直也今世人言顧手牢牢盆煮鹽盆也

浮食奇民欲擅管山海之貨

若人執倉庫之管籥

以致富羨

羨饒也

後利細民其沮事之議不可勝聽敢私鑄鐵器煮鹽者

鈇左趾

鈇音徒故反足鉗也

沒其器物郡不出鐵者置小鐵官

計鑄

鐵

使屬在所縣使僅咸陽乘傳舉行天下鹽鐵

舉皆也普天之

下皆行之

作官府

主煮鑄及出納

除故鹽鐵家富者為吏吏益多賈

人矣卜式為御史大夫

元鼎六年

見郡國多不便縣官作鐵

器苦惡

謂作鐵器民患苦其不好

價貴或強令民買之而船有算商

者少物貴乃因孔僅言船算事上不悅又董仲舒說上

曰今鹽鐵之利二十倍於古人必病之孝昭元始六年

令郡國舉賢良文學之士問以民所疾苦教化之要皆

對曰願罷鹽鐵酒榷均輸官無與天下爭利示以儉節

然後教化可興御史大夫桑弘羊難

詰難議者之言

以為此國

家大業所以制四夷定邊足用之本往者豪強之家得
管山海之利采石鼓鑄煮鹽一家聚或至千餘人大抵
盡流放之人遠去鄉里棄墳墓依倚大家相聚深山窮
澤之中成姦偽之業家人有寶器尚猶押而藏之況天
地之山海乎夫權利之處必在山澤非豪人不能通其
利異時鹽鐵未籠布衣有胸邴人君有吳王專山澤之
饒薄賦其人贍窮乏以成私威積而逆節之心作今縱
人於權利罷鹽鐵以資強暴遂其貪心衆邪羣聚私門

成黨則強禦日以不制而并兼之徒姦形成矣鹽鐵之利佐百姓之急奉軍旅之費不可廢也文學曰人庶藏於家諸侯藏於國天子藏於海內是以王者不蓄下藏於人遠爭利務民之義利立而人怨上若是雖湯武生存於代無所容其廬工商之事歐冶之任何姦之能成三桓專魯六卿分晉不以鹽冶故權利深者不在山海在朝廷一家害百姓在蕭牆不在胸郤大夫曰山海有禁而人不傾貴賤有平而人不疑縣官設衡立準而人

得其所雖使五尺童子適市莫之能欺今罷之則豪人擅其用而專其利也文學曰山海者財用之寶路鐵器者農之死士也死士用則仇讐滅田野闢而五穀熟寶路開則百姓贍而人用給人用給則富國而教之以禮禮行則道有讓而人懷敦朴以相接而莫相利也夫秦楚燕齊士乃不同剛柔異氣巨小之用倨勾之宜黨殊俗異各有所便縣官籠而一之則鐵器失其宜而農人失其便器用不便則農夫罷於野而草萊不闢草萊不

闢則人困乏也大夫曰昔商君理秦也設百倍之利收
山澤之稅國富人強蓄積有餘是以征伐敵國攘地斥
境不賦百姓軍師以贍故利用不竭而人不知地盡西
河而人不苦今鹽鐵之利所以佐百姓之急奉軍旅之
費務於積蓄以備乏絕所給甚衆有益於用無害於人
文學曰昔文帝之時無鹽鐵之利而人富當今有之而
百姓困乏未見利之所利而見其所害且利非從天來
不由地出所出於人間而為之百倍此計之失者也夫

李梅實多者來年為之衰新穀熟舊穀為之虧自天地不能滿盈而況於人乎故利於彼者必耗於此猶陰陽之不並晝夜之代長短也商鞅峭法長利秦人不聊生相與哭孝公其後秦日以危利蓄而怨積地廣而禍構惡在利用不竭乎於是丞相奏曰賢良文學不明縣官猥以鹽鐵為不便宜罷郡國榷酤酒關內鐵奏可於是利復流下庶人休息孝元時嘗罷鹽鐵官三年而復之後漢明帝時尚書張林上言鹽鐵食之急者雖貴人

不得不須官可自鬻獻帝建安初關中百姓流入荊州

者十餘萬家

荊州今襄陽南

及聞本土安寧皆企願思歸而無

以自業於是衛覲議以為鹽者國之大寶自喪亂以來

放散今宜依舊置使者監賣以其直並市犁牛百姓歸

者以供給之勸耕積粟以豐殖關中遠者聞之必競還

境魏武於是遣謁者僕射監鹽官移司隸校尉居弘農

流人果還關中豐實 陳文帝天嘉二年太子中庶子

虞荔御史中丞孔奐以國用不足奏立煮海鹽稅從之

後魏宣武時河東郡有鹽池舊立官司以收稅利先

是罷之而人有富強者專擅其用貧弱者不得資益延

興末復立監司量其貴賤節其賦入公私兼利孝明即

位復罷其禁與百姓共之自後豪貴之家復乘勢占奪

近池之人又輒障怙神龜初太師高陽王雍太傅清河

王懌等奏請依先朝禁之為便於是復置監官以監檢

焉其後更罷更立至於永熙自遷鄴後於滄瀛幽青四

州之境傍海煮鹽滄州置竈一千四百八十四瀛州置

竈四百五十二幽州置竈百八十青州置竈五百四十
六又於邯鄲置竈四計終歲合收鹽二十萬九千七百
八斛四斗軍國所資得以周贍矣 後周文帝霸政之
初置掌鹽之政令一曰散鹽煮海以成之二曰監鹽引
池以化之三曰形鹽掘地以出之四曰飴鹽於成以取
之凡監鹽每池為之禁百姓取之皆稅焉 隋開皇三
年通鹽池鹽井並與百姓共之 唐開元元年十二月
左拾遺劉彤論上鹽鐵表曰臣聞漢孝武之時外討戎

夷內興宮室殫費之甚十倍當今然而古費多而貨有
餘今用少而財不足者何也豈非古取山澤而今取貧
人哉取山澤則公利厚而人歸於農取貧人則公利薄
而人去其業故先王之作法也山海有官虞衡有職輕
重有術禁發有時一則專農二則饒國夫煮海為鹽採
山鑄金伐木為室農餘之輩也寒而無衣飢而無食傭
賃自資者窮苦之流也若能收山海厚利奪農餘之人
寬調斂重徭免窮苦之子所謂損有餘而益不足帝王

之道可不謂然乎臣願陛下詔鹽鐵伐木等官收興利
貨於人則不及數年府有餘儲矣然後下寬大之令蠲
窮獨之徭可以惠羣生可以柔荒服雖戎狄未服充湯
水旱無足虞也明皇令宰臣議其可不咸以鹽鐵之利
甚益國用遂令將作大匠姜師度戶部侍郎強循俱攝
御史中丞與諸道按察使檢責海內鹽鐵之課二十五
年倉部格蒲州鹽池令州司監當租分與有力之家營
種之課收鹽每年上中下畦通融收一萬石仍差官人

檢校若陂渠穿穴所須功力先以營種之家人丁充若
破壞過多量力不濟者聽役隨近人夫又屯田格幽州
鹽屯每屯配丁五十人一年收率滿二千八百石以上
准營田第二等二千四百石以上准第三等二千石以
上准第四等大同橫野軍鹽屯配兵五十人每屯一年
收率千五百石以上准第二等千二百石以上准第三
等九百石以上准第四等又成州長道縣鹽井一所並
節級有賞罰蜀道陵縣等十州鹽井總九千所每年課

欽定四庫全書

鹽法考例卷一百三十四

十一

鹽都當錢八千五十八貫

陵州鹽井一所課都當錢二千六十一貫
綿州井四所都

當錢二百九十二貫
資州井二十八所都當錢一千八

十三貫
瀘州井五所都當錢一千八百五十貫
榮州井

十三所都當錢四百貫
梓州都當錢七百一十七貫
遂

州四百一十五貫
閬州一千七百貫
普州二百七貫
果

州二十六貫若閏月共計加一月課隨月徵納任以錢糧兼

納其銀兩別常以二百價為估其課依都數納官欠即

均徵竈戶

自兵興上元以後天下出鹽各置鹽司節級
權利每歲所入九百餘萬貫文並杜氏通典

增唐有鹽池十八井六百四十皆隸度支天寶至德

間鹽每斗十錢乾元元年鹽鐵鑄錢使第五琦初變鹽

法就山海井竈近利之地置鹽院游民業鹽者為亭戶
免雜徭盜鬻者論法及琦為諸州權鹽鐵使盡榷天下
鹽斗加時價百錢而出之為錢一百一十自兵起流庸
未復稅賦不足供費鹽鐵使劉晏以為因民所急而稅
之則國用足於是上鹽法輕重之宜以鹽利多則州縣
擾出鹽鄉因舊監置吏亭戶糶商人縱其所之江嶺去
鹽遠者有常平鹽每商人不至則減價以糶民官收厚
利而人不知貴晏又以鹽生霖潦則鹵薄暵旱則土溜

墳乃隨時為令遣吏曉導倍於勸農吳越揚楚鹽廩至數千積鹽二萬餘石有連水湖州越州杭州四場嘉興海陵鹽城新亭臨平蘭亭永嘉太昌侯官富都十監歲得錢百餘萬緡以當百餘州之賦自淮北置巡院十三捕私鹽者姦盜為之衰息然諸道加榷鹽錢商人舟所過有稅晏奏罷州縣率稅禁堰埭以邀利者晏之始至也鹽利歲纔四十萬緡至大厯末六百餘萬緡天下之賦鹽利居半宮闈服御軍餼百官祿俸皆仰給焉貞元

四年淮西節度使陳少游奏加民賦自此江淮鹽每斤亦增二百為錢三百一十其後復增六十河中兩池鹽每斗為錢三百七十江淮豪賈射利或時倍之官收不能過半民起怨矣劉晏鹽法既成商人納捐以代鹽利者每緡加錢二百以備將士春服包估為汴東水陸運兩稅鹽鐵使許以漆器瑋瑁綾綺代鹽價雖不可用者亦高估而售之廣虛數以罔上亭戶冒法私鬻不絕巡捕之卒遍於州縣鹽估益貴商人來時射利遠鄉貧民

困高估至有淡食者巡吏既多官冗傷財當時病之其
後軍費日增鹽價寢貴有以穀數斗易鹽一升私糶犯
法未嘗少息順宗時始減江淮鹽價其後鹽鐵使李錡
盛貢獻以固寵朝廷大臣皆餌以厚貨鹽鐵之利積於
私室而國用耗屈榷鹽法大壞多為虛估率千錢不滿
百三十而已兵部侍郎李巽為使以鹽利皆為度支物
無虛估天下糶鹽稅茶其贏六百六十五萬緡初歲之
利如劉晏之季年其後則三倍晏時矣貞元二十一年

停鹽鐵使月進舊鹽鐵錢總悉入正庫以助給費而主
此務者稍以時市珍玩時新物充進獻以求恩澤其後
益甚歲進錢物謂之羨餘而給入益少又貞元末逐月
有獻謂之月進及是而罷 穆宗時田弘正舉魏博歸
朝廷乃命河北罷榷鹽戶部侍郎張平叔議榷鹽法弊
請官自賣鹽可以富國兵部侍郎韓愈條奏謂平叔請
令州府差人自糶官鹽可以獲利一倍臣以為城郭之
外少有見錢糶鹽多用雜物貿易鹽商則無物不取或

賒貸徐還兩得利便今令吏人坐鋪自賣非得見錢必不敢受如此則貧者無從得鹽自然坐失常課如何更有倍利又貧家食鹽至少或有淡食動經旬月若據口給鹽依時微價官吏畏罪必有威刑臣恐所在不安此尤不可之大者平叔又云浮寄姦猾者轉富土著守業者日貧若官自糶鹽不問貴賤貧富四民僧道并漁游手因其所食盡輸官錢并諸道軍諸使家口親族遞相影占不曾輸稅若官自糶鹽此輩無一人遺漏者臣以

為此數色人等官未糶鹽之時從來糶鹽而食不待官
自糶然後食鹽也國家榷鹽糶與商人商人納榷糶與
百姓則是天下百姓無貧富貴賤皆已輸錢於官矣不
必與國家交手付錢然後為輸錢於官也平叔議遂不
行 後唐天成元年敕諸州府百姓合散蠶鹽二月內
一度俵散依夏稅限納錢 後唐長興二年敕今後不
計農器燒器動使諸物並許百姓逐便自置造諸道監
冶除依常年定數鑄辦供軍熟鐵并器物雜使熟鐵亦

任百姓自練賣鐵場官并鋪戶一切並廢鄉村百姓祇於夏秋苗畝上納農器錢一分五文隨二稅送納周

顯德元年上謂侍臣曰朕覽食鹽未鹽州郡犯私鹽多於顆鹽界分蓋卑濕之地易為刮鹽煎造豈惟違我權

法魚又汚我好鹽況末鹽煎煉搬運費用倍於顆鹽今

宜分割十餘州令食顆鹽不唯輦運省力兼亦少人犯

禁自是曹宋以西十餘州皆食顆鹽

種者曰顆鹽出解州煮者曰末鹽出

海瀕宋制顆鹽出解州安邑解縣兩池以戶民為畦夫

悉蠲其他後每歲自三月一日墾畦四月始種八月乃
罷官廩給之以給本州及三京京東之濟兗曹濮單鄆
州廣濟軍京西之滑鄭陳潁汝許孟州陝西之河中府
陝虢州慶成軍河東之晉絳慈隰州淮南之宿亳州河
北之懷州及澶州諸縣之在河南者未鹽煮海則楚州
鹽城監通州豐利監泰州海陵監以給本州及淮南江
寧兩浙荆湖等軍杭州秀州有場明州昌國東西監溫
州天富南北監台州黃巖監福州長清場廣東東莞靜

安等十三場大率煮海有亭戶鹽丁鬻於官或折租稅
亦有役軍士定課煮者又有煮井者益州等路各有監
監則官掌井則土民幹鬻如數輸課聽徃旁境販賣唯
不得出川峽天聖八年上書者言陝西禁鹽得利微而
為害博兩池積鹽為阜其上生木合抱數莫可校請聽
通商平估以售可寬百姓之力乃詔罷三京二十八軍
州榷法聽商賈入錢若金銀京師榷貨務受鹽兩池自
是商賈流行然稅課之入官者頗耗自元昊反聚兵西

邊用度不足因詔入中他貨予絹償以池鹽由是羽毛筋骨膠漆錢炭瓦木之屬一切以鹽易之猾商貪賈乘時賕吏為姦至入椽木二估千錢給鹽一大席為鹽二百二十斤虛費池鹽不可勝計鹽直益賤販者不行公私無利朝廷知其敝乃詔復京師榷法凡商人以虛估受券及已受鹽未鬻者皆計直輸虧官錢內地州軍民間鹽悉收市入官官為置場增價而出之復禁永興同華耀河中陝虢解晉絳慶成十一州軍商鹽官自輦運

以衙前主之自禁榷之後量民之厚薄役令輓車轉致
諸郡道路糜費役人竭產不能償往往亡匿關內騷然
雖得鹽利不足以佐縣官之急並邊務誘人入中芻粟
皆為虛估騰踊至數倍歲費京師錢幣不可勝數帑藏
愈虛太常博士范祥乃請舊禁鹽地一切通商鹽入蜀
者亦恣不問罷並邊九州軍入中芻粟第令入實錢以
鹽償之視入錢州軍遠近及所指東西南鹽第優其估
東南鹽又聽入錢永興鳳翔河中歲課入錢總為鹽三

十七萬五千大席受以要券即池驗券按數而出盡弛
兵民輦運之後詔從之數年猾商貪賈無所僥倖關內
民安其業其後三司言京師商賈罕至則鹽直踊貴請
得公私並貿而餘則禁止官衛皆從之兩歲後畦戶以
解河中陝虢慶成民為之官司旁沿侵剝為苦乃詔三
歲一代嘗積逋鹽課至三百三十七萬餘席詔蠲其半
中間以積鹽多特罷種鹽一歲或二歲三歲以寬其力
其後減畦戶半又稍傭夫代之五州之民得安田里無

追逮侵剝之擾東南鹽利視天下為最厚鹽之入官淮

南福建斤為錢四兩浙杭秀為錢六溫台明亦為錢四

廣南為錢五其出視去鹽道里遠近而上下其估利有

至十倍者先是天禧初募人入緡錢粟帛京師及淮浙

江南荊湖州軍易鹽乾興元年入錢貨京師總為緡錢

一百四十萬會通泰蘄鹽歲損所在貯積無幾因罷入

粟帛第令入錢久之積鹽復多明道二年叅知政事建

言淮南鹽初甚善自通泰楚運至真州自真州運至江

浙荆湖綱吏舟卒侵盜販鬻從而雜以砂土涉道愈遠
雜惡殆不可食吏卒坐鞭笞配徙相繼而莫能止比歲
運河淺涸漕挽不行遠州村民頗乏鹽食而淮南所積
一千五百萬石至無屋以貯則露積苦覆歲以損耗又
亭戶輸鹽應得本錢或無以給故亭戶貧困徃徃起為
盜賊其害如此願得權聽通商三五年使商人入錢京
師又置折博務於揚州使輸錢及粟帛計直予鹽可得
緡錢三千萬以資國用贍國濟民無出於此時范仲淹

欽定四庫全書

欽定四庫全書
卷一百三十四

安撫江淮亦以疏通鹽利為言詔議施行 宋初行鹽

鈔以實西邊其法積鹽於解池積錢於在京權貨務積
鈔於陝西沿邊諸郡商賈以物解至邊入中請鈔以歸
物解至邊有數倍之息惟患無回貨故極利於得鈔徑
請鹽於解池舊制通行解鹽池甚寬或請錢於京師每
鈔六千二百登時給與但輸頭子錢數十而已以此所
由州縣貿易熾甚至為良法崇寧間蔡京始變鹽法俾
商人先輸錢請鈔赴產鹽郡授鹽欲囊括四方之錢盡

入中都以進羨要寵鈔法遂廢商賈不通邊儲失備東

南鹽禁加密犯法被罪者衆民間食鹽雜以灰土解池

天產美利乃與糞壤俱積矣於時御府用度日廣課入

欲豐申歲較季比之令至於鹽袋蠶鹽莫不有禁州縣

惟務歲增課以避罪法上下程督加厲七年乃降御筆

昨改鹽法立賞至重抑配者衆計口數及嬰孩廣數下

逮馳畜使良民受弊比屋愁歎悉從初令以利百姓三

省其申嚴近制改奉新鈔然有司不能將明帝意故比

較已罷而復用鈔劄既免而復行鹽囊增饒而復止民
力因以擾匱盜賊滋焉 宋初金銀銅鐵鉛錫之冶總

二百七十一政和間臣僚言諸路產鐵多民資以為用
而課息少請倣茶鹽法權而鬻之於是戶部言詳度官
制爐冶收鐵給引召人通市苗脈微者令民出息承買
以所收中賣於官毋得私相貿易徙之

文獻
通考

金濱海

多產鹽上京東北二路食肇州鹽遼頻路食海鹽臨潢
之北有大鹽澤烏庫哩舒魯部有鹽池皆足以食境內

之民嘗征其稅及得中土鹽場倍之故設法立官加詳
焉然而增減不一廢置無恒亦隨時救弊而已世宗還
自南京謂宰臣曰朕聞遼東凡人家食鹽但無引目者
即以私治罪夫細民徐買食之何由有引目可止令散
辦或詢諸民從其所欲因為之罷北京遼東鹽使司

元之立國初以酒醋鹽稅河泊金銀鐵冶六色取課於
民歲收銀萬錠太宗庚寅年始行鹽法每鹽一引重四
百斤其價銀一十兩世祖中統二年減銀為七兩至元

十三年既取宋而江南之鹽所入尤廣每引改為中統鈔九貫二十六年增為五十貫元貞丙申每引又增為六十五貫至大已酉至延祐乙卯七年之間累增為一百五十貫凡偽造鹽引者皆誅籍其家產付告人充賞凡私鹽徒二年杖七十止籍沒其家產之半有首告者於所籍之內以其半賞之行鹽各有郡邑犯界者減私鹽罪一等以其鹽之半沒官半賞告者然歲辦之課難易各不同有因自凝結而取者解池之顆鹽也有煮海

而後成者河間山東兩淮兩浙福建等處之末鹽也惟
四川之鹽出於井深者數百尺汲水煮之視他處為最
難云世祖時朝廷經費鹽利居十之八而兩淮鹽獨當
天下之半法日以壞以郝彬行戶部尚書省經理之彬
請度舟楫所通道里所均建六倉煮鹽於場運積之倉
歲首聽羣商於轉運司探倉籌定其所乃買券又定河
商江商市易之不如法者著為令世祖中統四年以禮
部尚書伊克紐爾領已括戶三千興煽鐵冶歲輸錢一

百三萬七千斤就鑄農器二十萬事易粟四萬石輸官

河南隨處市鐵之家令仍舊鼓鑄十二年阿哈瑪特等以

軍興國用不足議復立都轉運司量增課程元額鼓鑄

鐵器官為局賣十九年立鐵冶總管府從綦公直言設

冶場於別十八里鼓鑄農器又有鐵冶提舉司凡鐵課

各省皆有之鐵每引二百斤無引私販者比私鹽減一

等凡私鐵農器鍋金刀鎌斧杖及破壞生熟鐵器不在

禁限 明制辦鹽去處兩淮都轉運鹽使司兩浙都轉

運鹽使司山東都轉運鹽使司福建都轉運鹽使司河
東都轉運鹽使司陝西鹽課司廣東鹽課提舉司四川
鹽課提舉司雲南鹽課提舉司凡天下辦鹽去處每歲
鹽課各有定額年終各該運司并鹽課提舉司將周歲
辦過鹽課出給印信通關具本入遞奏繳其客商興販
鹽貨各照行鹽地方發賣不許變亂合用引目各運司
申報本部委官關領本部將來文立案委官於內府印
造督匠編號用印完備明立文案給付差來官收領其

各處有司凡有軍民客商中賣官鹽賣畢隨即將退引
赴住賣官司依例繳納運司按季通類解部本部塗抹
不用凡遇開中鹽糧務量彼處米價貴賤及道路遠近
險易明白定奪召商中納宣宗五年令兩淮兩浙長蘆
運司每歲額辦鹽課以十分為率八分給與守支客商
二分另為收積在官候邊方急缺糧儲召中以所積見
鹽人到即支謂之存積其八分年終挨次給守支客謂
之常股凡中常股價輕存積價重武宗時南京浙江織

造太監王瓚崔果奏討長蘆運司鹽一萬二千引至南
京變賣辦織造物料戶部司官李夢陽王宗文徐廷用
言於尚書韓文曰今新政之初不當准鹽課織造文等
執奏止與六千引上問內閣曰戶部何不全與對曰內
官裝載官鹽中間夾帶數多沿途害人且壅滯商課先
帝末年銳意整理鹽法此正今日急務上不悅曰天下
事豈只是幾個內官壞了譬如十人中也須有三四個
好人健等退復具揭帖力請如戶部議上不得已從之

世宗嘉靖七年上敕戶部曰甘肅邊儲久缺其詳畫經久之策以聞胡世寧曰甘肅米價踊貴由壞祖宗籌邊之策耳永樂中邊儲悉藉鹽法每鹽一引輸粟二斗五升富商悉聚邊鄙自行耕墾樹藝兼築堡聚所以兵強食足天順成化中變其良法輸金戶部商賈不復在邊芻粟悉資輓運轉販艱難益以饑荒價遂騰踊今米一石價至五兩兵民枵腹殫殍載道宜復鹽法以紓邊困霍韜亦云宜復鈔法以存竈戶輕引銀以來商賈上嘉

納之科臣郭鋆請革餘鹽先是鹽法開中有常股需次
支掣者有存積以俟不時之需者皆就邊輸納而掣鬻
於運司復有餘鹽則就運司輸價而兼運以鬻者也商
人便於運司且利其夾帶于是存積之法廢而邊儲匱
矣至是部議特設都御史總理故郭鋆上言官不必設
而餘鹽宜革上曰壞法始於餘鹽即革之以復祖宗良
法至二十一年部臣請復餘鹽以資邊用自是餘鹽復

行按國初天下鹽課俱於各邊開中上納本色米豆商
人欲求鹽利於近邊轉運本色以待開中故邊方粟

豆無甚貴之時至是戶部尚書葉淇淮安人鹽商皆其親識因與淇言商人赴邊納糧價少而有違涉之虞在運司納銀價多而得易辦之利淇然之內閣徐溥淇同年最厚淇遂奏准商引鹽悉輸銀戶部送太倉銀庫收貯分送各邊鹽銀積至一百萬餘兩人以爲利而不知其壞舊法也商人赴邊開中之法既廢近邊米豆無人買運價遂騰踊邊儲自此資於

明初取用諸課皆因

內帑而國匱民貧日難整理矣
各處土產礬鐵水銀銅錫有常額武宗時令廣東鐵稅置廠於省城外鹽課司正提舉專管鹽課副提舉專管鐵課其行鐵地方但有走稅夾帶等弊俱照鹽法事例

權酤一

原漢孝武天漢三年初權酒酤

韋昭曰以木渡水曰權謂禁人酤釀獨官開置

如道路木為權者獨取利顏師古曰權者步渡橋爾雅謂之石杠今之略約是也禁閉其事總入官而下無由以得若渡水之權約音酌孝昭始元末丞相田千秋奏罷酒酤賣酒

斗四錢孝元時賈捐之上書曰昔孝文時天下人賦四

十丁男三年而一事今天下人賦數百造鹽鐵權酒之

利以佐用度猶不能足而人困矣王莽時羲和魯匡言

名山大澤鹽鐵錢布帛五均賒貸幹在縣官

幹謂主領也音管

唯酒酤獨未幹酒者天之美祿帝王所以頤養天下享

祀祈福扶衰養疾百禮之會非酒不行故詩曰亡酒酤

我

酤買也言王於族人恩厚要在燕飲無酒則買而飲之也

論語云酤酒市脯不食

二者非相反也夫詩據承平之代酒酤在官和旨使人

可以相御也

旨美也御進也

論語孔子當周衰亂酒酤在人薄

惡不誠是以疑而弗食今絕天下之酒無以行禮相養

放而無限則費財傷人請法古令官作酒以二千五百

石為一均率開一壚以賣

壚賣酒之區也以其一邊高形如壚故取其名也

月

簣五十釀為準一釀用粗米二斛麴一斛得成酒六斛

六斗各以其市月朔米麴三斛并計其價而參分之

三參

以其一為酒一斛之平除米麴本價計其利而什分之

以其七入官其三及糴截灰炭

截酢漿也
截才代反

給工器薪樵

之費而人愈怨 陳文帝天嘉中虞荔等以國用不足

奏請榷酤從之 隋文帝開皇三年罷酒坊與百姓共

之 唐廣德二年十二月敕天下州各量定酤酒戶隨

月納稅除此外不問官私一切禁斷大曆六年二月量

定三等逐月稅錢並充布絹進奉建中三年制禁人酤

酒官司置店自酤收利以助軍費

杜氏通典

增貞元二年

復禁京城畿縣酒天下置肆以酤者每斗權百五十錢

其酒戶與免雜差役獨淮南忠武宣武河東權麴而已

按昔人舉杜子美詩以為唐酒價每斗為錢三百今權百五十錢則輸其半於官矣

會昌六年敕

揚州等八道州府置權麴并置官店酤酒代百姓納權

酒錢并充資助軍用限揚州陳許汴州襄州河東五處

權麴浙東浙西鄂岳三處置官店酤酒聞禁止私酤官

司過為嚴酷一人違犯連累數家今後如有百姓私酤

及置私麴者但許罪止一身並不得追擾 梁開平三

年敕聽諸道州府百姓自造麴官中不禁 後唐天成

三年敕聽諸道州府鄉村人戶自今年七月後於夏秋

田苗上每畝納麴錢五文一任百姓造麴醞酒供家其

村坊一任沽賣不在納榷之限 宋制三京官造麴聽

民納直諸州城内皆置務釀之縣鎮鄉閭或許民釀而

定其歲課若有遺利則所在皆請官酤初漢時犯私麴

者並棄市周祖始令至五斤死建隆二年以周法太峻
令民犯私麴者至十五斤以私酒入城至三斗者始處
極典其餘論罪有差私市酒麴者減造者罪之半三年
再下酒麴之禁凡私造差定其罪城郭二十斤鄉閭三
十斤棄市民敢持私酒入京城五十里西京及諸州城
二十里者至五斗死所定里數外有官署酤酒而私酒
入其地一石棄市乾德四年詔比建隆之禁第減之凡
至城郭五十斤以上鄉閭一百斤以上私酒入禁地二

石三石以上至有官署處四石五石以上者乃死法益輕而犯者鮮矣建炎以來朝野雜錄曰舊兩浙坊場一千三百三十四歲收淨利錢八十四萬緡至是合江浙荆湖人戶撲買坊場才百二十七萬而已蓋自紹興初概增五分之後坊場敗闕者衆故也初東遼之地未有榷酤鹽麴之法馮延休韓紹勳相繼商利欲與燕地平山例加繩約其民病之金熙宗天會三年始命榷酤官以周歲為滿世宗大定三年省奏中都酒戶多逃

以故課額愈虧上曰此官不嚴禁私釀所致也命設軍

百人隸兵馬司同酒使副合千人巡察雖權要家亦許

搜索奴婢犯禁杖其主百元之有酒醋課自太宗始

太宗辛卯年立酒醋務坊場官權酤辦課仍以各州縣

長官充提點官隸徵收課稅所其課額驗民戶多寡定

之甲午年頒酒麴醋貨條禁世祖二十一年盧世榮言

京師富豪戶釀酒價高而味薄以致課不時輸宜一切

禁罷官自酤賣向之歲課一月可辦徙之八月罷權酤

初民間聽自造酒每米一石得息鈔一十貫增舊十倍至是罷榷聽民自造但增課鈔一貫為五貫明太祖洪武二年令凡諸色人等躡造酒麴貨賣者須赴務投稅方許貨賣違者並依匿稅科斷其自行造酒家買用麴貨不在投稅之限如賣酒之家自無麴貨者須收買曾經投稅麴貨造酒貨賣依例辦納酒課若係自行造麴者其麴亦赴務投稅

續文獻
通考

榷酤二

原文學請罷

漢武帝天漢三年初推
酤賢良對策請罷推酤

丞相奏罷

昭帝時田

秋千

王莽計分利

詳通典

趙王使為賈

史記趙王彭祖
使使即縣為賈

人椎會入多於租稅以是趙多金錢注伴會兩
家買賣之價椎者禁他家獨王家得為之白帖

增官

販苦酒

魏名臣傳中書監劉放曰官販苦酒與
百姓爭錐刀之末請停之苦酒蓋醋也

畝納

麴錢

五代後唐敕於秋苗田上每畝納麴
錢五文一任百姓造麴酒詳前

祠部添酒

錢

戶部謂王祠部一文添酒錢
慶歷間王琪請添鹽酒課錢

耶律釋私醢

遠耶律
制心守

上京有捕獲私醢者制心一
飲盡笈而不治續文獻通考

原奪利於民

斂怨於

下陳魯匡之謀

收榮公之利

雖利在其中

而

敕歸其下

帖白

增城郭富豪之家坐收酤醢之利鄉

村貧弱之戶例納配率之錢法禁愈密籠取遺利

月比歲增無有藝極

文獻通考

榷茶

增唐德宗建中元年納戶部侍郎趙贊議稅天下茶漆
竹木十取一以為常平本錢及出奉天乃悼悔下詔亟
罷之貞元九年復稅茶先是諸道鹽鐵使張滂奏去歲
水災詔令減稅今之國用須有供儲伏請於出茶州縣

及茶山商人要路以三等定估十稅其一充所放兩稅其明年已後所得稅錢外貯若諸州遭水旱賦稅不辦以此代之詔可仍委張滂具處置條目每歲得錢四十萬貫茶之有稅自此始然稅無虛歲遭水旱處亦未嘗

以稅茶錢拯贍

按陸羽傳羽嗜茶者經三篇言茶之原之法之具尤備天下並知飲茶矣時衛

茶者至陶羽形置煬突間為茶神有常伯熊者因羽論復廣著茶之功其後尚茶成風回紇入朝始驅馬市茶羽貞元末卒然則嗜茶權茶皆始于貞元間矣穆宗即位兩鎮用兵帑藏空虛

禁中起百尺樓費不勝計鹽鐵使王播乃增天下茶稅

率百錢增五十江淮浙東西嶺南福建荆襄茶播自領之兩川以戶部領之天下茶加斤至二十兩播又奏加取焉文宗時王涯為相判二使復置榷茶自領之使徙民茶樹於官場然其舊積者天下大怨令狐楚代為鹽鐵使兼榷茶使復令納榷加價而已李石為相以茶稅皆歸鹽鐵復貞元之舊武宗即位鹽鐵轉運使崔珙又增江淮茶稅是時茶商所過州縣有重稅或掠奪舟車露積雨中諸道置邸以收稅謂之塌地錢故私販益起

大中初鹽鐵轉運使裴休請釐革橫稅以通舟船商旅
既安課利自厚又正稅茶商多被私販茶人侵奪其利
今請委彊幹官吏先於出茶山口及廬壽淮南界內布
置把提曉諭招收量加半稅給陳首帖子令所在公行
更無苛奪使私販者免犯法之憂正稅者無失利之歎
從之 宋乾德五年初權江淮湖浙福建路茶蓋禁南
商擅有中州之利故置場以買之自江以北皆為禁地
興國中樊若水奏江南諸州茶官市十分之八其二分

量稅聽自賣踰江涉淮乘時射利望嚴禁之謂乾德權
法也自若水建議其法始密凡茶之利一則官賣以實
州縣一則沿邊入中糧草算請以省餽運一則權務入
納金銀錢帛算請以贍京師而河東北互市川陝折博
又以所有易所無而其大者最在邊備蓋祖宗以西北
宿兵供億之費重困民力故以茶引走商賈而虛估加
擡以利之其後理財之臣以遺利在民數務更張然無
過李諮林特二法大槩以折茶商及便邊民特以實銀

算茶諮祖劉式之意使自就山園買茶而茶場坐收貼納之利行之三年而罷景祐以後西邊事興始復行加榷法嘉祐四年一切弛禁自此茶不為民害者六七十載至蔡京始復榷法於是茶利自一錢以上皆歸京師嘉祐三年始命韓絳陳升之呂景初即三司置局議弛茶禁詔曰古者山澤之利與民共之自唐建中始有茶禁上下規利垂二百年時聞比來為患益甚民被誅求之困官受濫惡之入私藏盜販犯者實繁嚴刑重誅情

所不忍是於江湖之間幅幘數千里為陷穽以害吾民也朕心惻然念此久矣間遣使往就問之驩然皆願弛其禁歲入之課以時上官一二近臣條析其狀朕猶若憮然又於歲輸裁減其課使得饒阜以相為生剗去禁條俾通商利歷世之弊一旦以除署為常經弗復更制損上益下以休吾民尚慮喜於立異之人緣而為姦之

黨妄陳議奏以惑有司必寘明刑無或有貸

一本云四年二月已

已詔開江淮茶禁聽民自賣通商收稅罷十三山場六
榷務歲輸不過三十三萬有奇謂之茶租錢以歲課均

賦於茶戶崇寧以後歲入至二百萬緡視嘉祐五倍矣政和

元年正月始創引法置都茶場歲收四百餘萬緡中興

循其法

玉海

金世宗大定間更定香茶罪賞格章宗時

尚書省奏茶飲食之餘非必用之物比歲上下競啜農

民尤甚市井茶肆相屬商旅多以絲絹易茶歲費不下

百萬是以有用之物易無用之物也若不禁恐耗財彌

甚遂命七品以上官其家方許食茶仍不得販賣及饋

獻不應留者以斤兩立罪賞宣宗時制親王公主及見

任五品以上官素蓄者聽存禁不得賣餽餘人並禁之
犯者徒五年告者賞寶泉一萬貫 元之茶課大率因

宋之舊而為之制世祖至元十三年定長引短引之法
以三分取一十七年置榷茶都轉運司於江州總江淮
荆湖福建之稅而遂除長引專用短引每引收鈔二兩
四錢五分三十年又改江南茶法每茶商貨茶必令賣
引無引者與私茶同引之外又有茶由以給賣零茶者
明初招商中茶上引五千斤中引四千斤下引三千

斤每七斤蒸曬一筵運至茶司官商對分官茶易馬商
茶給賣每上引仍給附茶一百筵中引八十筵下引六
十筵名曰酬勞經過地方責令掌印官盤驗佐貳官催
運若陝之漢中川之夔保私茶之禁甚嚴凡中茶有引
由出茶地方有稅貯放有茶倉巡茶有御史分理有茶
馬司茶課司驗茶有批驗所洪武初制官給茶引付產
茶府州縣凡商人買茶具數赴官納錢給引方許出境
貨鬻每引照茶一百斤茶不及引者謂之畸零別置由

帖付之仍量地遠近定以程限於經過地方執照若茶
無由引及茶引相離者聽人告捕其有茶不相當或有
餘茶者並聽拿問賣茶畢即以原給引由赴住賣官司
告繳洪武初令陝西邠州河州西寧各該茶馬司收貯
官茶每一年一次差在京官選調邊軍齎捧金牌信符
往附近番族將運去茶易馬二十二年定茶易上等馬
每匹一百二十斤中等馬每匹七十斤下等馬每匹五
十斤此易馬事例宣德十年准開中茶鹽許於四川成

都保寧等處官倉闕支官茶每百斤與折耗茶十斤自
備脚力運赴甘州支與淮浙官鹽八引運赴西寧與鹽

六引弘治三年令陝西巡撫召商報中給引赴巡茶御
史挂號於產茶地方收買茶斤赴原定茶馬司以十分

為率六分聽其貨賣四分驗收入官嘉靖十三年令開
茶之期商人報中每歲至八十萬斤而止不許開中太

濫致壞茶法此開中事例

楊士奇茶法議曰茶之出入
資引以照其批驗茶引所則

在應天常州浙江杭州三府今前項退引累催不繳其
故蓋因批驗所不置簿籍附寫茶商姓名貫址或不照

茶商路引聽其冒名間報或將引由賣與嗜利之徒齎赴產茶地方轉相貿易如此欲得的確名籍追繳退引難矣又如南直隸之常州廬州池州徽州浙江之湖州嚴州衢州紹興江西之南昌饒州南康九江吉安湖廣之武昌寶慶長沙荊州四川之成都保寧重慶夔州嘉定瀘州雅州等府俱係產茶地方相去前三批驗所遠者數十里近亦不下數百里若照引內條例聽茶商徑赴產茶府州納課買引照茶於人為便理必樂從誰肯不買引由公犯茶禁今却令茶商皆來此三所買引路途寫遠往返不便欲其一一遵依不作前弊亦難矣楊一清請復金牌疏畧曰臣親詣西寧等衛撫調番官指揮千百戶鎮撫驛丞偕其國師禪師各齎原降金牌信符而至臣奉宣皇上恩威責其近年不肯輸納茶馬之罪皆北面稽首稱不敢違臣於是乃知我聖祖神宗睿謀英略度越前代自唐世回紇入貢已以馬易茶至宋熙寧間乃有以茶易馬之制所謂以摘山之利而易

充廳之良戎人得茶不能為我害中國得馬足以為我利計之得者宜無出此至我朝納馬謂之差發如田之有賦身之有庸必不可少彼即納而酬以茶斤較之前代曰互市曰交易輕重得失較然可知國初散處降夷各分部落隨所指撥地方安置授之官秩聯絡相承以馬為科差以茶為酬價使知遠外小夷皆王官王民志向中國不敢背叛且如一背中國則不得茶無茶則病且死以是羈縻之賢數萬甲兵矣此制西番以控北敵之上策前代畧之而我朝獨得之者也頃自金牌制廢私販盛行雖有撫諭巡茶之官卒莫之能禁坐失茶馬之利垂百六十年豈徒邊方缺馬將意外之憂或從此生切照洪武年間頒降金牌數目如洮河西寧三衛番族金牌四十一而該納差發馬一萬四千五十一匹一號在內府收貯每三年一次遣廷臣齎捧收馬給茶後因邊方多事停止歷年滋久如曲先阿端諸衛邈不相通誠恐數十年之後雖近番亦不復知有茶馬矣乞敕

該衙門將金牌舊額查出申明照示番族使知朝廷修復舊制各當本等差發其番官指揮千百戶鎮撫驛丞等官久不襲替亦令查出奏請就彼各襲原職以為統領不必令其來京以弘治二十年為招易之期乞遣廷臣齋捧上號金牌前來會同臣等止在三衛住劄調取原降下號金牌前來納馬給茶原加賞勞事完造冊隨金牌齋繳以後三年一次奉行中間二年仍照常曉諭有情願者聽來將馬易茶庶幾番人懷畏永為藩籬之固矣並續文獻通考

算緡

原漢孝武元狩四年自作皮幣鑄白金後商賈以幣之變多積貨逐利於是公卿言商賈滋衆貧者蓄積無有

皆仰縣官異時算輅車賈人緡錢皆有差請算如故

緡絲

也以貫錢一貫千錢出二十為算也詩云維絲伊緡輅小車

諸賈人未作貫貸賣買

居邑貯積諸物

貫賂也貸假與

及商以取利者雖無市籍各以

其物自占

占隱度也各隱度其財物多少而為名簿送之於官也

率緡錢二千而

算一

率計有二千錢者皆出一算也

諸作有租及鑄率緡錢四千算一

非吏比者三老北邊騎士輅車一算

比例也身非為吏之例非為三老非

為北邊騎士而有輅車皆令出一算也

商賈人輅車二算

商賈人有輅車又使多出二算

重其賦也船五丈以上一算匿不自占占不悉成邊入緡錢

也 志直

有能告者以其半畀之

有不輸稅者令人得告以半與之也

天子既

下緡錢令而尊卜式百姓終莫分財佐縣官於是楊可

告緡徧天下

楊可人姓名按義縱傳云時楊可方受告緡縱以為此亂人部吏捕其為可使者楊

可據今而發動之故天下皆被告也商賈居積及工巧之家非桑農所出謂之緡茂陵中書有緡田奴婢是也

中家以上大抵皆遇告憲司理之獄少反者

理匿緡獄少有反者

反音幡謂從輕而出

乃分遣御史廷尉正監分曹

分曹言曹輩而出為使也

往

往即理郡國緡錢

就其所在而理也

得民財物以億計奴婢以

千萬數田大縣數百頃小縣百餘頃宅亦如之於是商

賈中家以上大抵破人偷甘食好衣不事蓄藏之產業

而縣官以鹽鐵緡錢之故用少饒矣初大農管鹽鐵官

布多置水衡欲以主鹽鐵及楊可告緡上林財物衆乃

令水衡主上林上林既充滿益廣乃分緡錢諸官而水

衡少府大農太僕各置農官徃徃即郡縣比沒入田田

之即就也比謂
比者沒入也其沒入奴婢分諸苑養狗馬禽獸及與

諸官官益雜置多謂雜置官
員分掌徙奴婢衆而下河漕度四

百萬石及官自糴乃足其後令吏得入粟補官及罪人

贖入粟甘泉不復告緡晉自過江至於梁陳凡貨賣奴婢馬牛田宅有文券率錢一萬輸估四百入官賣者三百買者一百無文券者隨物所堪亦百文收四名為散估歷宋齊梁陳依此為常以人競商販不為田業故使均輸欲為懲勸雖以此為辭其實利在侵削

此亦算緡之類杜氏

通典 漢以後算緡附見關市征及雜稅內

關市征一

增周官司市國凶荒札喪則市無征而作布

有災害物貴市不稅

為民困乏也金銅無山年

厘人掌斂市紬布總布質布

因物貴大銷泉以飭民

蜀布厘布而入於帛府

布帛也鄭司農云斂布列肆之稅布杜子春云總當為僞謂無肆立持者之稅也總布謂守斗斛銓衡者之稅也質布者質人之所罰犯質劑者之泉也罰布者犯市令者之泉也厘布者貨賄諸物邸舍之稅

漢高祖約法省禁量吏祿以賦於

民而山川園池市肆租稅之入自天子至於封君湯沐邑皆各自為私奉養不領於天下經費武帝元光六年初算商賈太初四年徙弘農都尉治武關稅出入者以給關吏卒食王莽篡位於長安及五都立五均官令工

商能採金銀銅鐵錫登龜取貝者皆自占司市錢府順
時氣而取之諸取衆物鳥獸魚鼈百蟲於山林水澤及
畜牧者嬪婦桑蠶織紵紡績補縫工匠醫卜及他方技
商販賈人坐肆列里區謁舍皆各自占所為於其所在
之縣官除其本計其利十一分之一而以其一為貢敢不
自占占不以實盡沒入所采取

按葬之法既權商賈之
貨而取其十一又效商

賈之為而
官自買賣

宋孝武大明八年詔東境去歲不稔宜廣

商賈遠近販鬻米粟者可停道中雜稅自東晉至陳西

有石頭津東有方山津各置津主一人賦曹一人直水
五人以檢察禁物及亡叛者荻炭魚薪之類小津並十
分稅一以入官淮水北有大市百餘小市十餘所備置
官司稅歛既重時甚苦之 後魏明帝時稅市入者人
一錢其店舍又為五等收稅有差 北齊黃門侍郎顏
之推奏請立關市邸舍之稅開府鄧長顓贊成之後主
大悅於是以其所入供御府聲色之費軍國之用不在
此焉 後周閔帝初除市門稅及宣帝即位復興入市

之稅每人一錢 隋文帝受禪除入市之稅

唐武后長安二

年鳳閣舍人崔融上議曰臣伏見有司稅關市事條不限工商但是行人盡稅臣謹按周禮九賦其七曰關市之賦唯欲出入之商賈不稅往來之行人而有司不識大體徒欲益帑藏助軍國不知軍國益擾帑藏愈空何則關為詰暴之所市為聚人之地稅市則人散稅關則暴興必若師興有費國儲多官即請倍算商客庶幾人免憂懼

德宗時趙贊請諸道津會置吏閱商賈錢每緡稅

二十開成二年武寧軍節度使薛元賞奏泗口稅場應是經過衣冠商客金銀羊馬斛斗見錢茶鹽綾絹等一切已上並稅今商量其雜稅物請停絕敕旨淮泗通津

向來京國自有率稅頗聞怨謫今依元賞所奏並停其所置官司所由悉罷 宋自李重進平以宣徽北院使

李處新知揚州樞密直學士杜韓監州稅

止齋陳氏曰以朝臣監州

稅始於此蓋收方鎮利權之漸然是時初未以此置官也據太宗實錄上謂趙普等曰王仁贍雖吏為姦諸州場院皆隱沒官錢朕初即位悉罷去分命使臣掌其事利入遂數倍以此見諸州監當分差使臣自太宗始雍熙三年始著於令監當使臣京朝官並三年替仍委知州通判提舉之遂為定員 關市之稅凡

布帛什器香藥寶貨羊彘民間典賣莊田店宅馬牛驢騾索駝及商人販茶鹽皆算有敢藏匿物貨為官司所

捕獲沒其三分之一以其半畀捕者販鬻而不由官路者罪之有官頒者十取其一謂之抽稅凡州縣皆置務

關鎮或有焉大則專置官監臨

景德二年詔諸路商稅年額及三萬貫以上審

官院選親民官臨候

小則令佐兼領諸州仍令都監都押同掌之

行者齎貨謂之過稅每千錢算二十居者市鬻謂之住稅每千錢出三十太宗淳化二年詔曰關市之租其來舊矣用度所出未遑削除征算之條當從寬簡宜令諸路轉運使以部內州軍市征所算之名品共叅酌裁減

以利細民又詔除商旅貨幣外其販夫販婦細碎交易
並不得收其算常稅名物令有司件析揭榜頒行天下
大中祥符元年詔免諸路州軍農器收稅神宗熙寧七
年詔減國門稅數十種錢不滿三十者蠲之其先外城
二十門皆責以課息近止令隨其閒要分等以檢捕獲
失之數為賞罰既而以歲旱復有是命八年手詔問中
書賈販之物法不稅者其市利錢當輸否時有司創稅
買物之入京者謂之市例錢以祿吏帝疑焉故問之哲

宗元祐八年商人載米入京糶者力勝稅權蠲

兵部尚書蘇軾

上言臣聞穀太賤則傷農太貴則傷末是以法不稅五穀使豐熟之鄉商賈爭糶以起太賤之價災傷之地舟車輻輳以壓太貴之直自先王以來未之有改也而近歲法令始有五穀力勝稅錢使商賈不行農末皆病廢百王不刊之令典而行自古所無之弊法臣切為聖世病之何以削去近日所立五穀力勝稅錢一條只行天聖附令免稅指揮則豐凶相濟農末皆利縱有水旱無大饑荒矣

高宗建炎元年詔京

城久閉道路方通有販貨上京者與免稅又詔凡殘破州縣合用竹木磚瓦並免收稅又詔於平江崑山縣江灣浦量收海船稅又慮稅網太密詔減并一百三十四

處至於牛米柴麪民間日用所需並與罷稅孝宗時詔鄉落墟市貿易皆從民便不許人買撲收稅減罷州縣稅務甚多寧宗時減罷州縣稅務亦不一

文獻通考

遼太

宗得燕置南京城北有市百物山峙命有司治其征餘四京及他州縣貨產貿遷之地置亦如之金世宗大

定二年罷諸路關稅止令譏察二十年定商税法金銀百分取一諸物百分取三元初未有定制太宗時始立徵收課稅所辦課程至元七年遂立三十分取一之

制二十年詔各路課程差廉幹官二員提調增羨者遷
賞虧允者倍償降黜二十六年從丞相僧格之請遂大
增天下商稅逮至天歷之際天下總入之數視至元七
年所定之額蓋不啻百倍云順帝至元三年立船戶提
舉司十處提領二十處定船戶科差船一千料之上者
歲納鈔六錠以下遞減 明宣宗宣德四年令南京至
北京沿河漕縣臨清州濟寧州徐州淮安府揚州府上
新河客商輳集去處設立鈔關差御史及戶部官照鈔

法例監收船料英宗正統六年罷上新河監收船鈔官

十一年移漕縣關鈔於河西務十二年令差主事二員

於臨清淮安監收船料鈔景帝景泰元年鈔關俱差主

事一年更代

是後主事差停不一或用各府委佐貳官一員每歲輪收

凡一應在外

收稅衙門有都稅有宣課有司有局有分司其收稅有

本色有折鈔其起解收貯有入內府有留各處其差官

有巡視監收例名不一洪武二十三年令各處稅課司

局商稅俱三十分稅一

按明初止有商稅未嘗有船鈔至宣德間始設鈔關凡七所若

臨清杭州蕪樵商稅其所推本色錢鈔則歸內庫以備
賞賜折色銀兩則歸太倉以備邊儲每歲或折本輪收
或折色居七分之三其收鈔有輕
重差官有專攝亦有攝而復罷者

關市征二

原無索

月令孟夏門閭無閉關市無索順陽氣敷縱不難物

不租

年不順成關梁不租

仲秋易

月令仲秋易關市來商旅四方來集遠鄉皆至則財不匱上無乏用百事乃遂注謂輕稅商也

孟冬謹

月令孟冬戒門閭修鍵閉謹關梁

市廛而不稅

市廛舍但稅其舍不

稅其物也

關譏而不征

譏察而已不征稅也此殷制

司關掌其征

禮周

司關掌國貨之節以聯關市故有關市之征國凶札則無關門之征

廛人入其斂

掌斂市布

而入於帛
府並白帖

增用其中者

續文獻通考曰宋陳恕令三司吏各條茶法第為三等曰

上者取利太深可行之商賈
不可行之朝廷吾用其中者

權利至矣

又王旦遣漕臣語之曰朝

廷權利
至矣

增收一分

文獻通考曰政和間漕臣劉既濟申明於則例外增收一分稅錢而

一分增收稅錢

減四之一

續文獻通考曰元耶律楚材奏薦張英為河南路徵

收課稅所長官廩訪使英將行言於楚材曰僕不敏誤蒙不次之用以書生而理財賦已非所長又况河南兵

荒之後遺民無幾烹鮮之喻正在今日急而擾之糜爛必矣願假以歲月使得撫摩瘡痍以為朝廷愛養基本

萬一之助楚材善之英既至按行境內親問監務月課錢何難易若何有以增額言者英責之曰剥下欺上汝

欲我為之耶減元額四之一公私便之

苟撻幹之無遺

則歎愁之寧

免漢算緡錢下逮末作之人唐為官市害及鬻樵

之夫

宋劉克莊進言

雜稅一

原漢高帝十一年令諸侯王通侯常以十月朝獻及郡各以其口數率人歲六十三錢以給獻費孝武元光六年冬初算商車

始稅商賈船車令出算也

太初四年冬行幸回中徙

弘農都尉治武關稅出入者以給官吏卒食孝昭元鳳

六年令郡國無飲今年馬口錢

往時有馬口出飲錢今省之武帝時租及六畜

宣帝時耿壽昌奏請增海租三倍天子從其計御史大

夫蕭望之奏言故御史屬徐宮

御史大夫屬也

家在東萊言往

年加海租魚不出長老皆言武帝時縣官嘗自漁海魚

不出後復與民魚乃出夫陰陽之感物類相應萬事盡

然宜且如故上不聽末年盜賊羣起匈奴侵寇大募天

下囚徒名曰猪突豨勇一切稅吏人皆三十而取一

後漢靈帝時南京災中常侍張讓趙忠等說帝令歛天

下稅田十錢以治宮室

蜀李雄薄賦其人口出錢四十文巴人謂賦為實因為名焉實

之名舊矣其賦錢四十則始於李雄也

宋元嘉二十七年後魏南侵軍

旅大起用度不充王公妃主及朝士牧守各獻金帛等物以供國用下及富室小人亦有獻私財數千萬者揚南徐兗江四州富有之家貲滿五十萬僧尼滿二十萬者並四分借一過此率計事息即還齊武帝時王敬

則為東揚州刺史

在今會稽郡也

以會稽邊帶河海人無士庶

皆保塘陂敬則以功力有餘悉課歛為錢以送臺庫帝納之竟陵王子良上表曰臣忝會稽粗閑物俗塘丁所

上本不入官良曰陂湖宜壅橋路須通均夫訂

陀頂直反

人自為用若甲分毀壞則年一修改乙限堅完則終歲無役今乃通課此直恣以還臺租賦之外更生一調致令塘路崩蕪湖源洩散害人損政實此為劇建元初軍用殷廣浙東五郡丁稅一千乃質賣妻子以充此限所逋尚多尋蒙蠲原而此等租課三分逋一明知徒足擾人實自弊國愚謂課塘丁一條宜還復舊北齊稅僧尼令曰僧尼坐受供養游食四方損害不少雖有薄斂

何足為也 隋文帝登庸又除入市之稅 唐開元十

八年御史大夫李朝隱奏請薄百姓一年稅錢充本依

舊令高戶及典正等捉隨月收計將供官人料錢自天寶末

年盜賊奔突克復之後府庫一空又所在屯師用度不足於是遣御史康雲間出江淮陶銳往蜀漢豪富戶皆籍其家資所有財貨畜產或五分納一謂之率貸所收巨萬計蓋權時之宜其後諸道節度使觀察使多率稅商賈以充軍資雜用或於津濟要路及市肆間交易之處計錢至一千以上者皆以分數稅之自是商旅無計多失業矣上元中敕江淮堰塘商旅率船過處準斛斗納錢謂之堦程大歷初諸州府應稅青苗錢每畝十文充百司工力資課三年十月十六日臺司奏緣兵馬未散百司支計不給每畝更加五分

貞元九

年制天下出茶州商人販者十分稅一

杜氏通典

增肅宗

即位時兩京陷沒民物耗敝乃遣御史鄭叔清等籍江淮富商右族訾蓄什收其二謂之率貸諸道亦稅商賈以贍軍錢一千者有稅德宗時朱滔王武俊田悅背叛國用不給陳京請借富商錢度支杜佑以為軍費裁支數月幸得商錢五百萬緡可支半歲乃以戶部侍郎趙贊判度支杜佑行借錢令約罷兵乃償之搜督甚峻民有自經者家若被盜然總京師豪人田宅奴婢之估裁

得八十萬緡又取僦櫃納質錢及粟麥糶於市者四取其一長安為罷市遮邀宰相哭訴乃以錢不及百緡粟麥不及五十斛者免而所獲裁二百萬緡時軍用不給乃稅間架算除陌其法屋二架為間上間錢二千中間錢一千下間錢五百吏執筆握算入人家計其數或有宅屋多而無他資者出錢動數百緡匿一間者杖六十告者賞錢五萬除陌法者公私給與及買賣每緡官留五十錢給他物及相貿易者約錢為率算之市牙各給

印紙人有買賣隨日署記翌日合算之有自貿易不用市牙者給其私簿無簿者投狀自集其有隱錢百者沒入二千杖六十告者賞十千其法既行市牙得專其柄率多隱盜公家所入不能半而怨讟滿天下及涇原兵反大呼長安市中曰不奪爾商戶僦質不稅爾間架除陌矣於是間架除陌竹木茶漆鐵之稅皆罷捉錢之事唯唐有之貞觀初京司及州縣皆有公廨田供公私之費其後以用度不足京官有俸賜而已諸司置公廨本

錢以番官貿易取息計員多少為月料十五年以諸司
令史主之號捉錢令史每司九人補於吏部所主纔五
萬錢以下市肆販易月納息錢四千歲滿受官褚遂良
上言七十餘司更一二載捉錢令史六百餘人受職厘
肆之人苟得無耻不可使其居職太宗乃罷捉錢令史
復給京官職田開元十八年御史大夫李朝隱請籍百
姓一年稅錢充本依舊令高戶及典正等捉隨月收利
供官人料錢並取情願自捉不得令州縣牽挽乾元元

年敕長安萬年兩縣各備錢一萬貫每月收利以充和
僱時祠祭及蕃夷賜宴別設皆長安萬年人吏主辦二
縣置本錢配納質積戶收息以供費諸使捉錢者給牒
免徭役有罪府縣不敢劾治民間有不取本錢立虛契
子孫相承為之嘗有毆人破首詣閑廐使納利錢受牒
貸罪御史中丞柳公綽奏諸司捉錢戶府縣得捕役給
牒者毀之自是不得錢者不納利矣 宋建隆二年詔
自今宰相樞密使帶平章事兼侍中中書令節度使依

故事納禮錢宰相樞密使三百千藩鎮五百千充中書門下公用仍於中書刻石記授上年月已經納者後雖轉官不在更納舊相復入者納如其數時中書門下言唐制凡視事於中書者納禮錢三千緡近頗墮廢乞舉行之故也開寶三年令買撲坊務者收抵當買撲始見此至淳化中而買撲酬獎之法次第舉矣買撲之利歸於大戶酬獎之利歸於役人州縣坐取其贏以佐經費以其利數上供此其大畧也自熙寧悉罷買撲酬獎之法官自名買實封投狀著價最高者得之而舊章舉廢矣元

豐二年三司言人戶買撲官監及非新酬衙前場務所

增收錢並合入三司帳而司農寺謂官監務外皆是新
法拘收錢不當入三司乞留以助募役兼歲入百萬緡
於市易務封樁若失此錢恐不能繼爭辯久之乃從司
農之請徽宗自崇寧來言利之臣殆析秋毫其最甚若
汧汧州縣創增鎖柵以牟稅利官賣石炭增賣二十餘
場而天下市易務炭皆官自賣名品瑣碎則有四脚鋪
牀榨磨等錢水磨錢侵街房廊錢廟圖錢淘沙金錢不
得而盡記也大觀三年臣僚言比歲諸郡求以坊場增

給公帑不啻二十餘萬緡且慮朝廷封樁寔為厨傳之費請考元豐舊制詳議行之詔令戶部以所用封樁及坊場錢數申尚書省

坊場即墟市也商稅酒稅皆出焉

稅契始於東晉

歷代因之宋開寶二年始收民印契錢令民典賣田宅輸錢印契徽宗崇寧三年敕諸縣典賣牛畜契書并稅租鈔旁等印賣田宅契書並從官司印賣除紙墨等工費外量收息錢助贍學用其收息不得過一倍孝宗時敕令所進呈重修淳熙法上親筆圈記人戶內驢駝馬

船契書收稅諭輔臣曰凡有此條並令刪去恐後世有算及舟車之言又臣僚言民間典賣田產必使之請官契輸稅錢其意不徒利也慮高貲之家兼并日增下戶日益朘削是亦抑之之微意今州縣以人戶物力科配空給印紙名為預借契錢殊失法意詔禁止之經總制錢者宣和末陳亨伯以發運兼經制使因以為名廢於靖康而建炎復之紹興初孟庾提領措置財用又因經制之額增析而為總制錢蓋南渡以來養兵耗財為夥

不敢一旦暴斂於民而展轉取積於細微之間以助軍費初非強民而加賦也建炎二年上在維揚四方貢賦不以期至於是戶部尚書呂頤浩翰林學士葉夢得等言亭伯以東南用兵嘗設經制司取量添酒錢及增收一分稅錢頭子賣契等錢斂之於細而積之甚衆求之於所欲而非強其所不欲如增收印契錢出於蕪井之家無傷於下戶增收賣酒錢合於人情而無害於民官吏俸給除頭子錢百分取一靖康初相繼遽罷欲望博

延羣議更加討論且亨伯為河北轉運使又行於京東
西昨來河北京東西一歲得錢近二百萬緡所補不細
今若行於兩浙江東西荆湖南北福建二廣歲入無慮
數百萬計况邊事未寧苟不知出此緩急必致暴斂與
其暴斂於倉卒曷若取積於細微於是除不便於民者
以權添酒錢添賣糟錢人戶典賣田宅增添牙稅錢官
員等請給頭子錢并樓店務增添三分房錢五者令東
西八路州軍收充經制錢命各路憲臣領之州委通判

拘收季終起發月椿錢始於紹興二年時韓世忠駐軍建康宰相呂頤浩朱勝非共議令江東漕臣月椿發大軍錢十萬緡以朝廷上供經制及漕司移用等錢應辦當時漕司不量州軍之力一例均拋於是州縣橫歛銖積絲累僅能充數一月未畢而後月之期已逼江東西之害尤甚板帳錢亦軍興後所創也嘉定十六年兩浙運判耿秉言二浙近日州縣見闕至無人願就蓋今縣邑之所苦者板帳錢額太重耳額重而收赴不及計無

所出則非法妄取以納斛斗則增收耗剝交錢帛則多收糜費幸富人之犯法而重其罰恣胥吏之受賕而課其入索到盜賊不還失主檢校財產不及其卑幼亡僧絕戶不候覈實而拘籍入官逃產廢田不與銷豁而逼勒填納遠債之難索者豪民獻於官則追催甚於正稅私納之為罰者仇家訟於縣則監納過於贓錢賒酒不至於公吏而抑配及保正戶長檢稅不止於商旅而苛細及於盤合奩具今年之賦稅已足而預借於明年田

產之交易未成而探契以寄納其他如罰酒賣紙稅醬

下拳錢之類殆不可以徧舉無非違法州郡利其能辦

財賦佯若不聞一旦告發則邑宰坐罪而去後人繼之

未免循復前例蓋其太重之額既不減則亦別無他策

爾且是法創立經隔已數十年物價有低昂戶口有息

耗安可不隨時而加損乞令臣與諸郡從長斟酌將合

減之數開具聞奏去其太甚而立為中制庶幾仰副聖

天子惠養斯民之意從之

文獻
通考

金制租稅之外算其

田園屋舍車馬樹藝之數及其藏錙多寡徵錢曰物力
物力之外又有鋪馬軍需輸庸司吏河夫桑皮故紙等
錢名目細瑣不可殫述又有牛頭稅即牛具稅猛安謀
克部女直戶所輸之稅也其制每耒牛三頭為一具限
民口二十五受田四頃四畝有奇歲輸粟大約不過一
石官民占田無過四十具世宗大定末苦錢幣不通以
問宗尹對曰錢者有限之物積於上者滯於下所以不
通海陵軍興為一切之賦有菜園房稅養馬等錢大定

初因仍不改今天下無事府庫充積宜悉罷去上從之
章宗二十二年詔民間買賣金銀懷孟諸路竹貨江淮
以南魚利皆弛其禁二十六年置浙東江東江西湖廣
福建木綿提舉司責民歲輸木綿十萬匹以都提舉司
總之 元額外課凡三十有二曰厯日曰契本曰河泊
曰山場曰窑冶曰房地租曰門攤曰池塘曰蒲葦曰食
羊曰荻葦曰煤炭曰撞岸曰山查曰麴曰魚曰漆曰醢
曰山澤曰蕩曰柳曰牙例曰乳牛曰抽分曰蒲曰魚苗

曰柴曰羊皮曰磁曰竹葦曰薑曰白藥其歲入之數唯
天曆元年可考 明制府州縣稅課司局河泊所歲辦
商稅魚課并引由契本等項課程已有定額其辦課衙
門所辦錢鈔金銀布絹等物不動原封年終具文分豁
存留起解數目赴所管州縣轉解藩司藩司通類委官
起解至京凡買賣田宅頭匹赴務投稅洪武初京城置
塌房及六畜場停積商客貨物聽其兩平交易革罷官
私牙行但收免牙錢一分洪武二十六年定凡龍江大

勝港俱設立抽分竹木局有三分取一者有三分取
一者有十分取二者成祖永樂六年設通州白河盧溝
通積廣積抽分五局

白河抽分竹木局嘉靖時裁革

憲宗成化六年令

每處差主事給事中御史各一員按季更換英宗正統
元年設真定稅課司帶管木植從滹沱河運至通州抽

分其後本府坐委通判一員監督稅課司抽分

後差太監一員

往真定會同本府委官抽分

成化七年設杭州荊州太平抽分三廠

又有保定抽分英宗時設蘭州抽分宣宗時設漁課事

例每歲南京戶科編印勘合皆以河字為號戶部發各該衙門收掌各記收魚課米鈔若干年終送繳各省直河泊衙門累朝建革不一其已革衙門魚課或歸并附近河泊所歲辦不缺續文獻通考

雜稅二

原徵羽翮

羽人以時徵羽翮之征於山澤之農以當邦之政令

徵齒角

角人掌徵齒角

骨物於山澤之農

一曰山林

周禮司徒以土會之法辨五地之生一曰山林其動物宜毛物

其植物宜阜物

一曰川澤

其動物宜鱗物其植物宜膏物

不稅童枯

山澤童枯

則不

其利蒲魚

周禮謂水澤之利也

年不順成

山澤列而不賦注列遞列

也雖不賦尚
禁止禮記

魚不加租

宣帝時欲增海租三倍蕭望之奏言比如海租魚不出武

帝時縣官嘗自漁而
不加租帝不聽之

有司收水澤之賦

月令孟冬命有司收水澤

之賦謂蜃蛤
蒲葦之屬

寄民幹山海之貨

食貨志得食寄民欲擅幹山海之貨注幹

謂主領之以致富
美利佃人也白帖

增掌少府

文獻通考曰漢山澤園池之稅本以給供養而

少府掌之其後倣占虞衡之意而置水衡乃取少府之
所謂山林苑池之稅而付水衡以平之然他日猶有江

海陂池屬少府者而海丞
果丞猶掌之於少府之下

假貧民

又曰後漢和帝時自京師離宮果園

上林廣成園悉以假貧
民得悉採捕不收其稅

載師漆林之征

周官載師漆林之征二十

而五

山川租稅之入

漢制詳關市征內

弛江湖陂塘之禁

文獻

通考曰五代時淮南江浙荆湖廣南福建當階徧之時應江湖及池潭陂塘聚魚之處皆納官錢或令人戶占賣輸課或官遣吏主持太宗淳化元年詔諸處魚池舊皆省司管理與民爭利非朕素懷自今恩池塘河湖魚鴨之類任民採取

弛山場河泊之禁

續文獻通考曰元成宗武宗屢弛山場河泊蘆

蕩之禁

貢獻一

原廣雅曰貢稅也上也鄭玄曰獻進也致也屬也奉也

皆致物於人尊之義也

周禮獻賢能之書于王鄭玄注獻進也又曰獻禽以祭社鄭玄

注獻致也屬也又曰古者致物於人尊之曰獻通行曰饋毛詩箋云獻奉也

案尚書禹別九

州任土作貢其物可以特進奉者曰貢盛之於篚而進

者曰篚若不常歲貢須賜命乃貢者曰錫貢故兗州厥

貢漆絲

地宜漆林又宜桑也

青州厥貢鹽絺

細葛

海物惟錯

雜也非一種

岱畎絲枲鉛松怪石

怪石石之似玉者岱出五物貢

徐州厥貢惟土五

色

王者封五色土為社建諸侯使各割其方土色與之使立社庶以黃土直以白茅白取潔黃取王者覆四

方羽畎夏翟

翟雉名羽中旌龍羽山之名

嶧陽孤桐

嶧山陽特生桐中琴瑟

泗

濱浮磬

泗水涯中見石可以為磬

淮夷蠙珠暨魚揚州厥貢惟金三

品

金銀銅

瑤琨

美玉

篠簜

篠竹

齒革羽毛

惟木

荊州厥貢羽

毛齒革惟金三品

杅

柘也

枯柏

柏葉松

礪砥

砥細於礪皆磨石

砮

砮石中矢鏃

丹惟箇簞

美竹也

包匭菁茅

菁以爲菹茅以縮酒

豫

州厥貢漆枲絺紵梁州厥貢璆鐵銀鏤砮磬熊羆狐狸

織皮雍州厥貢球琳琅玕

石似珠

兗州厥篚織文

錦綺之屬篚盛

之爲貢也

青州厥篚檠絲

檠桑蠶絲中琴瑟絃

徐州厥篚玄纁

玄黑纁縞

白縞織細也織在中明二物皆常細也

揚州厥篚織貝

織細紵目水物鄭玄云貝錦

荊

州厥篚玄纁璣組豫州厥篚織纁揚州錫貢厥包橘柚

小曰橘
大曰柚
豫州錫貢
磬錯治玉石
荊州納錫
大龜尺二寸

出九江
是也
又周禮以九貢致邦國之用一曰祀貢犧牲包茅之屬

二曰嬪貢嬪或為賓皮帛之屬
鄭玄謂貢絲案也
三曰器貢宗廟玉器玄謂器者銀鏤

金
四曰幣貢繡帛也玄謂玉帛皮幣
五曰材貢竹木之材
六曰貨貢金珠

龜
七曰服貢祭服
八曰旂貢毛羽之屬
九曰物貢謂九州之外各以所

產之物為贄若肅
慎貢錯矢之類
是也
獻者謂貢篚錫貢之外所進奉

者也
禮記曰獻車者執綏
獻馬者執勒
獻人虜者操右

袂
執琴瑟者上左手
獻几者拂之
獻杖者執其末
此其

制也

貢獻二

原純牛

文馬

周書成王時西夷貢獻卜盧純牛純牛牛之小者孔晁注曰卜盧盧之西北戎

今盧水是也

東觀漢記曰建武二十六年南單于遣使獻駱駝二頭文馬十匹

江龜海

貝

上詳敘事

尚書大傳曰夏成五服外薄四海南海魚革珍珠大貝鄭注所貢物也貝古以為貨

青帶

白環

海魚鮓魏略曰漢陽嘉三年疎勒國王獻西海青石帶

皇甫謐帝王世紀曰西王母

慕舜德來獻白環及玦并貢並地圖

火鼠

冰蠶

魏志景初二年二月西域獻火浣布神異

經曰南荒之外有火山晝夜火焚火中有鼠重百斤毛長二尺餘細如絲可以作布恒居火中時時出外而白

色以水逐而沃之乃死取緝其毛織以為布拾遺記曰水蠶長十寸有鱗甲以雪霜覆之然後為繭其色五

采織為文錦入水不濡投火不燎唐克世海人獻之以為黼黻

蔗一節

梨三箱

鄧德

明南康記曰雩都縣土壤肥沃偏宜甘蔗味及采色餘縣所出無一節數十碎郡以獻御魏武帝嘗為兗州

牧上書曰山陽郡美

丹砂

玄玉

周書曰成王時四夷來貢卜盧人西

梨謹獻甘梨三箱

南之蠻丹砂所出尚書大傳曰夏成五服外海四海主諸靈龜陰谷玄玉鄭玄注所貢之物

白鸛

丹鵠

西京雜記曰閔越王獻高祖白鸛各一隻高祖大悅厚報使者拾遺記曰塗修國獻青鳥丹

鵠各一雄一雌

然芳苾

置蔓苔

郭子橫洞冥記曰元鼎元年起招仙門於閣上然芳

苾燈此草形如麻齊盧國來獻拾遺記曰晉惠帝時祖梁國貢蔓苔色如金榮叢如雞卵投水中蔓延波瀾

之上如火宮人有幸者以金苔賜之置漆盤中照燭滿室名夜明苔

桴鼓

荃蘼

周書成王

時康人獻桴鼓者其實食之宜子孔晁注曰康人亦西戎之別食芳苳即有身洞冥記曰光和元年波祗國

亦名波弋國獻神精香草一名荃蘼亦名春蕪一根而百條其枝間如竹節柔軟其皮如絲可為布所謂春蕪布亦曰香荃堅密如水紈也握之一片滿宮皆香婦人帶之彌芬馥也

香橘

文瓜

楊

異物志曰橘為樹白華而赤實皮既馨香裏又有美味交趾有橘官長一人秩三百石主歲貢御橘王逸荔枝

枝賦曰大哉聖皇處乎中州東野貢落疏之文瓜南浦上黃甘之華橘

古黃馬

茲白

牛

周書曰成王時犬戎獻文馬文馬赤鬣身目若金名曰古黃之來孔晁注曰犬戎西戎之達者又成

王時大夏獻茲白牛茲白牛野獸也牛形而象齒孔晁注曰大夏西北戎也

合枝李

同

心梨

西京雜記曰初修上林苑羣臣遠方各獻異果有合枝李 殿龜龍涼州記曰呂光時燉煌太守宋

歆獻同
心梨

吉光裘

昆吾劍

十洲記曰天漢三年西國王使使獻吉光裘 列子

曰周穆王征西戎獻昆吾之劍赤刀切玉如切泥

紫玉壺

青金鏡

交州雜記曰太

康四年林邑王范能獻紫水精唾壺一口青白水精唾壺二口山海經曰堂夜之山多水玉郭璞注水玉即水

精也 洞冥記曰望塘閣上有青金鏡廣四尺元光中波祇國獻此青金鏡照見魑魅百鬼不敢隱形初學記

增定國寶

鏤金牀

酉陽雜俎曰唐代宗即位初楚州獻定國寶一十二乃詔監國

詔曰上天降寶獻自楚州神明生歷數之符合璧定妖災之氣初楚州有尼真如忽有人接去天上天帝言下方有災令以此寶鎮之其數十二楚州刺史崔旆表獻焉一曰元黃天符形如笏長八寸有孔辟人間兵疫二

曰玉雞毛白玉也王者以孝理天下則見三曰穀璧白玉也如粟粒無雕鏤之跡王者得之五穀豐熟四曰西王母白環二枚所在處外國歸伏五闕名六曰如意寶珠大如雞卵七曰紅鞋鞵大如巨粟八曰卿耶珠二枚通常珠徑一寸三分九曰玉玦形如玉環四分缺一十曰玉印大如半手理如鹿形陷入印中十一曰皇后採桑鉤細如箸屈其末十二曰雷公石斧形無孔諸寶置之日中白氣連天 棠苑詳注曰洪武甲辰春江西行省以陳友諒鏤金牀進即命毀之謂侍臣曰此與孟昶七寶溺器何異以一牀工巧若此其餘可知侍臣曰未富而驕未貴而侈此陳氏所以敗亡也

水精盆

珍珠傘

續文獻通考曰元憲宗七

年回鶻獻水精盆珍珠傘等物可直銀三萬餘錠帝曰方今百姓疲敝所急者錢耳朕獨有此何為却之審典赤以為言帝稍償其值且禁其勿復有所獻

舍利寶玩

狎忽大珠

又曰元成

宗元貞元年緬國獻舍利寶玩九年時賈胡有獻寶珠者議以六十萬錠酬之曰此所謂押忽大珠也含之則不渴慰面可使目有光左丞尚文曰一人含千萬人不渴則誠寶也若一寶止濟一人則用已微矣吾之所謂寶者米粟是也有之則百姓安無則天下亂以功用較之豈不愈於彼乎

四麒麟 二獅

子又曰明宣宗宣德八年西南海外諸番國戎王或子弟各泛海數千萬里而來朝及貢麒麟獅象珠玉珍貝奇異之品麒麟凡四而出非一所又憲宗成化辛丑西域以二獅子進遣中官往迎之先是西域撒馬兒罕既至嘉峪關遣人入奏乞賜大臣迎接職方郎中陸容禮部尚書周洪謨俱言不可事遂寢而遣中官迎焉

貢獻三

原天子班貢

左傳云盟于平丘子產爭承曰昔天子班貢輕重以列列尊貢重周之制也卑而貢

重者甸服也鄭伯男也而使從公侯之貢懼弗給也

諸侯入貢

周禮小行人曰今諸侯春入貢

秋獻功王親受之各以其國之籍禮之鄭注云貢六服所貢也

三邦底貢

禹貢云惟苗落楷三

邦底貢三物皆出雲夢

五官致貢

曲禮鄭注云貢功也

任土作貢

禹貢孔安

國注曰任其土地所有定其貢賦之差

任圃貢草

周禮閭師云任圃以樹事貢草木鄭注貢

草木謂韭果蓏之屬

獻其所有

穀梁云天王使家父來求車古者諸侯時獻于天子以其國之

所有故有辭讓而無微求求車非禮也求金甚矣

畢獻方物

書旅獒云無有遠邇畢獻方物

任貢物

周禮閭師云任衡以山事貢其物任虞以澤事貢其物

制地貢

周禮大司

徒云乃分地職奠地守制地貢而頒職事焉以為地法而待政令鄭玄注云制地貢謂九職所稅也

定

九州入貢

漢書食貨志云禹平洪水定九州判土田各因遠近賦貢

以九貢

致國用

詳前貢獻

各以其職來貢

說苑云禹陂九澤通九道定九州各以其職來

貢不失

各以其國遠物

禮器云其餘無常貨各以其國之所有則致遠物也鄭云

厥宜

其餘謂九州之外夷

內金示和

又云內金示和鄭注此所貢也

加璧尊德

又

束帛加璧尊德也

來獻其琛

毛詩泮水篇云憬彼淮夷來獻其琛元龜象齒

鄭注享所以贊也

大賂南金注憬遠也琛寶也元龜長尺二寸賂遺也南謂荆揚

來獻瓊玉

竹書紀年夷王二年

蜀人呂人來獻瓊

獻其白琯

大戴禮云昔虞舜以大德嗣堯布功散德西王

玉甯于河用介珪

毋來獻其白琯粒

獻常滿杯

十洲記云周穆王時西胡獻夜光常滿杯杯容

食之民昭然明視

三 獻千里馬

漢書賈捐之上書曰孝文帝時有獻千里馬者詔曰鸞旗在前屬車在後吉行

日五十里朕乘千里馬獨先安之

獻朱鬣馬

太公六韜云商王徇周伯昌于美里太公與散

宜生以金千鎰求天下珍物以免君之罪于是得犬戎氏文身駿馬朱鬣目如黃金項如鷄毛名曰難斯之乘以獻

獻服牛

穆天子傳鵠韓獻服牛三百注服可服用者

獻良犬

又云獻良

犬七十注良調習者

上翠羽

王褒雜章云伏聞今月吉辰立皇太后謹貢翠羽瑤瑁甲上萬歲壽也

通天簪

又云吉日佳辰誕聖生副奉通天簪二枚珠千八百貫

獻珥于齊王

韓子云薛公相齊齊威王夫人死中有十孺子皆貴于王薛公欲知王所欲立而請置一人以為夫人欲知王欲置以勸王置之於是為十玉珥而美其一獻之王以賦十孺子明日坐視美珥之所在而勸王以為夫人又

國策云楚王后死未立后也謂昭魚曰公何不請立后
昭魚因買五雙珥令其一善而獻之王明日視善珥所

在請
獻璧于秦王戰國策云張儀為秦破從連橫說
楚王楚王遣車百乘獻夜明之璧

于秦
三譯獻白雉援神契云周成王時越裳獻白雉
去京師三萬里王者祭祀不相踰

宴食祀服有節則至又感精
符云魯昭公時白雉銜環入
九真獻奇獸漢書宣帝
紀神爵元

年詔曰九
真獻奇獸
屠耆獻名馬東觀漢記光武紀建元十三
年是時屠耆國獻名馬又劍

直百金以
賜騎士
燕人致梟騎漢書高帝紀云北燕人致梟
騎北駱國也張晏曰驍勇

西國獻靈膠十洲記武帝幸北海祠恒山西國王使
獻靈膠四兩吉光毛裘時武帝幸上林

射虎而弩絃斷使者時從駕又上膠一分使口濡以續
弩弦帝驚曰異物膠色青如碧玉吉光毛裘黃色蓋神

馬之類表入水數日不沉入火不焦

胡王獻神香

十洲記武帝幸安定西胡月支國王遣使

獻香四兩大如雀卵黑如桑椹紫香一名驚精香一名震靈九一名反生香一名震檀名一名人鳥精一名却死香一種六名香氣聞數百里死者在地聞香氣乃却活後元元年長安城內病者數百亡者大半帝試取月支神香燒之于城內其死未三月者皆活

獻駭雞之犀

戰國策楚王獻駭雞之犀于秦

獻不死之藥

戰國策云有獻不死之藥於荆王者謂者操以入中射之士問曰可食乎曰可因奪

而食之王怒使人殺中射之士中射之士使人說王曰臣問謁者謁者曰曰可食臣故食之是臣無罪而罪在謁者且客獻不死之藥臣食之而王殺之是死藥也王殺無罪之人而明人之欺王王乃不殺

獻秦

山旁邑

史記云濟北王以天子宜封禪上書乃獻其泰山旁邑

獻魚鹽之地

論衡

云孝平元始四年金城塞外羌良橋種良願等獻其魚鹽之地願內屬漢遂得西王母石室因為西海郡

楯鏤黃金獻吳

越記曰越勾踐作盾嬰以白壁鏤以黃金狀似龍蛇行者乃使大夫種獻

之於吳王
吳王大悅

銅生馬箠獻吳

吳會分地記曰夏山者勾踐於此山鑄銅不鑠埋之

土生馬箠勾踐遣使取徙於南
社種之飾治以為箠獻之於吳

唐叔得禾獻之天子

書序唐叔得禾異畝同穎獻諸天
子王命唐叔歸周公於東作歸禾

南夷奉茅獻於天

子
祭左傳僖公四年齊桓公責楚云爾貢包茅不入王
祭不供無以縮酒郊特牲云縮酒用茅明酌也周禮

甸師之祭祀供蕭茅鄭興云蕭字或為蒿蒿讀為縮束
茅立之祭前酒沃其上酒滲下若神飲之故為之縮

赤鳥之人獻女於天子

穆天子傳曰赤鳥之人亦獻
好女於天子女聽女列為嬖

人曰赤鳥氏美人之地也寶玉之所在也

越飾養女獻於吳王

史記越王乃飾養女

西施鄭旦使大夫種獻之於吳吳王悅之

正南以珠璣瑋瑁為獻

正西

以龍角神龜為獻

汲冢周書伊尹受命為四方令曰臣請正東符婁仇州伊慮漚深九夷十

蠻越漚滿文身請令以魚文之鞞烏鰂之醬鮫鼈利劍為獻正南甌鄧桂國捐子產里百濮九菌請令以珠璣

瑋瑁象齒文犀翠羽菌鶴短狗為獻正西崑崙狗國鬼親枳已闌耳貫胸雕題離立漆齒請令以丹青白旄紕

蜀江歷龍角神龜為獻正北空同大夏莎車姑他旦畧貌胡戎翟匈奴樓煩月氏域犁其龍東胡請令以索駝

白玉野馬駒騏驎良弓為獻湯曰善北堂書鈔

豹皮

詩曰獻其貔皮赤豹黃羆

羽扇

晉庾渾嘗以白羽扇獻帝撫其非新反之剗劬云云

彝器

傳諸侯皆獻彝器於王晉獨無有何也叔

向曰與喪賓宴又求羹器非禮也

賓蒙

夷狄布貨

地貢

地以生物入貢

庭實

旅百

獻藥

獻不死之藥詳書鈔

獻芹

列子曰昔有獻芹於鄉老嘗之若笑而退也

述職

漢詔曰諸侯納貢非為財帛所以述職

底貢

底致也

藝貢事

合諸侯藝

貢事禮也

歸時事

韓宣子聘周王使請事對曰晉士起將歸時事於宰旅注時事四時

藝法也

貢職宰旅冢宰之事也言

珠還太守

後漢順帝詔桂陽太守文襲獻

貢獻于宰旅者不敢斥尊

大珠以希幸媚帝令還之

劍賜騎士

光武有獻千里馬及寶劍劍賜騎士馬駕鼓車

府

無虛月

魯之於晉職貢不乏府無虛月

史不絕書

文選棧山航海踰沙軼漠之貢史不

絕書

諸侯常獻

高帝詔欲省賦甚今獻未有程吏或多賦以為獻宜令諸侯常以十月朝獻郡

國各以口數率人歲六十三錢以給獻費

王府則有書

民致遠物懷方氏掌

遠方之民貢致遠物

官受方物

傳諸侯官受方物

有獻於尊

凡於尊者有獻

而不敢以聞此謂獻辭

有獻於公

顧考叔

各以地有

周禮制其貢各以地

所有盡其土實

土地所有

貢獻無極

亡可待也

誅求無時

索志

敵賦以來會時事也

疲敝郡國

光武詔郡國所獻疲敝今大官勿受也

奔騰險

阻

桓帝時南海獻龍眼荔枝十里一置五里一堆奔騰險阻死者繼路

貢之有時

方物貢之

有時取之以道

貢之無藝

陳之藝極

藝極法度

入以歲時

實布

晉食貨志夷人輸實布戶一匹遠者或一丈遠夷不課

義米

又曰田者輸義米戶三斛

達者五斛米極達者
輸算錢八十二文

朝鮮馬

魏志歲國今朝鮮皆其地出果下馬漢時嘗獻

之才高三尺以上

西旅獒

書西旅獻獒太保作旅獒

哀牢夷

鄭純為永昌守與哀

牢夷得歲輸布貫頭衣
領二鹽一斛以為常賦

務相氏

晉書廩君出武落丹穴名務相氏巴姓種

類遂繁奏并為黔中郡薄賦之口出錢
四十巴人呼賦為賓因謂之賓人也

嚮風來享

來王

貴寶為贄

周禮九州之外謂之蕃國也一見各以其貴寶為贄象胥論言語也

鴻臚

寺量訓

主客式諸蕃夷進獻荅諸色無估價物鴻臚寺量之訓荅也

武陵守加稅

後漢順帝時武陵守上書以蠻夷率服可比漢
民增租請加稅虞翻云不可帝不從果叛白帖

增歲

貢侏儒

唐書曰陽城為道州刺史州產侏儒歲貢朝廷城哀其生離無所進帝使求之城奏曰州民盡

短不知何者可貢自是罷

歲進鞍馬

續文獻通考曰遼聖宗時南

節度使貢獻止進鞍馬許之

獻琴藥

又曰宋度宗咸淳二年謝方

張丹藥一爐獻上蓋以舊學故也賈似道疑其有觀望再相之意令臺勅之以為不當誘人主為聲色之好欲

謫遠郡呂文德願以已官贖丞相罪遂爾得免

獻金銀

唐書曰宇文士及從

招之士及亦遣家僮間道走長安通諄勤且獻金環帝悅曰我嘗與士及共事今以此獻是將來矣

巧

索異珍

又曰唐敬宗驕僻不君杜元穎每欲中帝意以固幸乃巧索異珍獻之踵相躡於道

掎

歛獻貢

又曰齊映為桂管江西兩觀察使罷不以罪翼復進乃掎歛獻貢以中帝欲

無他

獻

又曰明皇謂張說曰今有事岱宗而懷州刺史王丘餽牽外無他獻我知其不市恩也

獨無

獻

又曰李絳遷戶部侍郎判本司帝以問戶部故有獻而絳獨無何哉答曰凡方鎮有地則有賦或嗇用度

易羨餘以為獻臣乃為陛下謹出納烏有羨贏哉若以為獻是從東庫物實西庫進官物結私恩也帝乃悟

所獻賜將士

又曰藩鎮李正己畏帝威斷表獻錢三十萬緡以觀朝廷帝意其詐未能答崔

祐甫曰正己誠詐不如遣使勞其軍以所獻就賜將士若正己奉承詔旨是陛下恩洽士心若不用彼自歛怨單且亂又使諸藩不以朝廷為重賄帝曰善正己慙服

停額外貢獻

續文獻通考曰明世

宗嘉靖時張紳請停額外貢獻曰皇上登極詔旨有額外進貢一切停止之言但恐各鎮守總兵等官不能仰體聖懷或託舊例以誤天聽或假謝恩以售已私如內織造所用紅花於所產之處稅糧內折收而寧夏鎮總衙門所貢紅花並不繫令甲之內特一時獻諛之徒創為此舉遂為厲階而所入之花播種耕耨看守採擇之

苦不可勝言歲無豐凶例取登足往往督趣窮軍出錢
賂補而又程途寫遠輸運艱難起役丁夫催倩車馬以
及指稱盤費打點使用尤為不貲朝廷之所得幾何而
計其所耗固已百倍於所貢之數至於鎮總等官到任
未幾輒有獻馬之舉名為謝恩此實先朝敝風昔皇祖
却竹簾之進仁宗動色於黃驥賈胡之奏英宗拒海溥
馬駝之進伏願陛下上純祖武下憫人窮亟為停免凡
不係有司額貢者並不許貢獻以擾軍民庶幾不失詔
旨之
瓊林大盈
唐書曰德宗播遷府藏委棄衛兵無
楮衣至是天下貢獻稍至於是行在

夾廡署瓊林大盈二庫別
藏貢物陸贄諫乃撤其署

皇馬快船

續文獻通考曰
明孝宗弘治十

八年吏部尚書馬文升請草大槩曰我太宗文皇帝遷
都北平其南京并各處進貢方物尚未有皇馬快船之
差至宣德正統年間或裝載薦新品物用船數多所過
州縣動撥人夫千百名銀不下數十萬俱係下民膏脂

伏望將前項薦新如青梅蓮藕宣梨苔菜之類於中量免進奉省少船隻楊梅枇杷鱖魚北方不產者照舊進奉其餘若馬槽蹄籩之類止運竹木來京著落此處匠役編造仍敕南京兵部今後差撥馬快船隻務令滿船裝載不許多撥沿途擾人庶運民免擾害之弊上大喜從之

淡菜蚶蛤

唐書曰明州歲貢淡

菜蚶蛤之屬孔戣以為自海抵京師道路後凡四十三萬人奏罷之

脂盃妝具

又曰李德裕為

浙西觀察使敬宗立侈用無度詔浙西上脂盃妝具德裕言士子教令常貢之外悉罷進獻願詔宰相議何以俾臣不違詔旨不疲人不歛怨則前敕咸可遵承不報方是時罷進獻不閱月而求貢使者足相接於道故德裕舉一以罷龍團

續文獻通考曰明太祖洪武二十四年敕天下產茶去處歲貢皆有

定額而建寧茶品為上其所進者必碾而抹之壓以銀板為大小龍團上以重勞民罷造龍團惟採茶芽以進

却靳簞

又靳州進簞太祖謂廷臣曰古者方物之貢惟服食器用故無耳目之娛玩好之失今進

竹簞固為用物但無命來獻恐天下聞風爭進奇巧勞民傷財自茲始矣却之仍詔四方非朝廷所需者毋妄

獻

原悅服

樂輸

望日來賓

以時入貢

九貢

任土百貨以時

誅求不已且歎無時

供給既難

寧無虛月

飲化爰來人無遠邇

率職而入貢有等

夷

闕貢楚不供

齊桓伐楚曰爾貢包茅不入王祭不供寡人是徵對曰貢之不入寡人之

罪也敢不供給

宋不供

宋義王不供職貢

是懼

不供是懼

是徵

寡人是徵

問罪

貢或不供必先問罪

移過

臨事有虧則思移過

既爽樂輸

宜

科情職 先期不告 誰今當辜 未乖悅使 何悔

樂輸 闕而為罪 無之實難 宜守命以供時 豈

絕書而重月 慢官之後徒欲費辭 戒事之前何不

申報 訴貢賦懼不給

子產爭承曰鄭伯男也使從公侯之貢懼不給也貢之無極亡

可待也日中以爭至於昏晉人許之注承謂貢賦之次

永薄賦

叔孫會於宋季武子使視邾滕

言此比邾滕永薄賦也

苟非讐敵 敢不樂輸 請息薄言

宜寬厚歛 事必舉中 節宜奉上 訴永減而猶可

請不供而謂何 子產爭承曰班輕重 叔孫將命

請視邾滕

雖家財將竭宜緩誅求

而國賦是資則


難蠲免

白帖

貢獻四

原詔梁沈約訓荆雍義士獻物者詔曰昔義舉之初人
懷自竭輸賦罄產同致厥誠言念一槩思有所酬其雄
荆郢三州有獻物助軍國者外可詳加蠲報 唐中宗
斷進獻奇巧制曰朕凝懷紫宙滌想丹闕考千古之澆
淳稽百王之治亂蒿宮茅柱實興國之清猷玉席珠衣

乃危邦之弊化朕自承天纂運佩日披圖希齊驚飲之
年願躡鶉居之代漢文提弔少小留心晉武焚表生平
措意頃為皇符肇建寶廟初登眷彼王公多為進奉莫
不龍歌令節蛟食芳辰椒花獻頌之時菊蕊浮觴之日
或雕金鏤玉採六合之珍奇或剪翠裁紅飾三春之草
樹上行延納下務經求鄺開紛紜公私逼迫昇平欲濟
蠹害非輕言念於茲深無所謂即宜懲革勿至因循



御定淵鑑類函卷一百三十四